

嬾窟詞一卷

侯寔

嬾窟詞

目錄

水調歌頭四調

水龍吟一調

風入松三調

鳳皇臺上憶吹簫一調

玉樓春二調

菩薩蠻十五調

昭君怨一調

朝中措七調

阮郎歸三調

浣溪沙三調

臨江仙二調

江城子一調

天仙子一調

鵲橋仙一調

瑞鶴仙三調

多麗一調

遙天奉翠華引一調

蝶戀花一調

秦樓月一調

西江月二調

四犯令一調

點絳脣二調

浪淘沙一調

眼兒媚一調

柳梢青二調

南歌子一調

醉落魄三調

滿江紅五調

念奴嬌三調

蕩山溪一調

清平樂二調

新荷葉一調

青玉案三調

鷓鴣天四調

蘇武慢一調

踏莎行二調

漁家傲二調

杏花天一調

瑞鷓鴣一調

減字木蘭花一調

嬾窟詞目錄終

嬾窟詞目錄

嬾窟詞

宋 侯 實

水調歌頭（題嶽麓法華臺）

曉霧散晴渚。秋色滿湘山。青鞵黃帽。快與名士共躋攀。窈窕深林幽谷。詰曲危亭飛觀。俯首眎塵寰。長嘯望天末。餘響下雲端。白鶴去。荒井在。汲清寒。醒然毛骨浮邱。招我御風還。拂拭蒼崖苔蘚。一寫胸中豪氣。渺渺洞庭寬。山鬼善呵護。千載照層巒。

又（上饒送程伯禹尙書）

涼吹送溪雨。落日散汀鷗。暮天空闊無際。層巒綠蛾浮。上印初辭藩寄。拂袖欣還故里。歸騎及中秋。倚杖飽山開。回首翠微樓。一區宅。千里客。舊從遊。甘棠空有餘蔭。誰解挽公留。翰墨文章獨步。富貴功名餘事。當代仰風流。暫蠟登山屐。終作濟川舟。

又（爲鄭子禮提刑壽）

湘水照秋碧。衡岳際天高。繡衣玉節清曉。歡傾擁旌旄。本是紫庭梁棟。暫借雲臺耳目。駟傳小遊遨。五筴與三楚。釀愛勝春醪。掃樓槍。蘇耄倪。載弓褒。遠民流戀。須信寰海荷甄陶。坐享龜齡鶴算。穩佩金魚玉帶。常近赭黃袍。歲歲秋月底。沈醉紫檀槽。

又（爲張敬夫直閣壽）

天地孕冲氣。霜雪實嘉平。粹然經世材。具應爲聖時生。妙處爲仁受用。顛倒縱橫無壅。一笑泮春冰。袖手無一語。四海已傾情。紫巖老游戲事。悟誠明。當年夷夏高仰。玉振更金聲。家有淵騫高弟。可但閒詩閒禮。衣鉢要相承。周辰絢餘彩。商鼎味新羹。

瑞鶴仙（送張丞罷官歸柯山）

楚山無際碧。湛一溪晴綠。四郊寒色。霜華弄初日。有玉明遙草。金鋪平磧。天涯倦翼。更何堪臨歧送客。念飛蓬斷梗。無蹤把酒後期難覓。愁寂。梅花憔悴。茅舍蕭疏。倍添悽惻。維舟岸側。留君飲。醉休惜。想柯山春晚。還家應對。菊老松堅舊宅。嘆宦游。索寞情懷。甚時去得。

又（爲劉信叔太尉壽）

溥天氣稜廓。看慶綿鴻祚。助昭麟閣。蕃宣換符鑰。占西南襟帶。徧□汕幕。湘流繞郭。藹一城和氣霧薄。聽嘈嘈。比屋歡聲。共說吏閒民樂。遙想。甞霏冕暖。翠擁屏深。曉風傳樂。瓊映緩酌。花陰淡。柳絲弱。任松凋鶴瘦。蓮欹龜老。丹頰常如舊。渥趁天中去。押西班牙。奉觴御幄。

又（詠含笑）

春風無檢束。故倡條冶葉。恣情丹綠。鶯喧燕宿。似東鄰北里。都無貞淑。高情恨蹙。歎何時重見。桂菊。又誰知天上黃姑。掃盡晚春餘俗。幽獨。鉛華不御。翡翠帷深。鬱金裙款。長眉瞭目。嫣然態。倚脩竹。縱青門瓜美。江陵橘老。怎比無窮賸馥。最難禁扇底橫枝。惱人睡足。

滿江紅（中秋上劉恭甫舍人）

天闊江南秋未老。空江澄碧。江外月飛來千丈。水天同色。萬屋覆銀清不寐。一城踏雪寒無跡。況楚風連陌。競張燈如元夕。山猿靜。棠陰寂。秋稼盛。香膠直。聽子城吹角。青樓橫笛。君不見。蘇仙翻醉墨。一篇水調鏘金石。念良辰美景。賞心時。誠難得。

又

困頓春眠。無情思。夢魂飄泊。簷外雨霏霏。冉冉乍晴還落。山黛四圍頻入眼。柳絲一縷低縈閣。念沈郎多感。更傷春。腰如削。風入戶。香穿箔。花似舊。人非昨。任遊蜂雙燕。經營拂掠。海闊錦魚傳不到。洞深紫鳳期難約。漫綵牋牙管。倚西窗。題紅藥。

又（和徐叔全御帶）

重到西湖春拆信。露花酥滴。倚危闌。湖山佳處。短屏著色。擬泛一舟蒼莽岸。恐傷萬里羈游客。賴款門修竹。有高。人留狂迹。傾蓋意。真相得。詩句裏。曾相識。看戛然飛動。筆端金石。照眼光浮瓊液滿。斷腸翠擁宮靴窄。問多情。還肯借青鸞。通消息。

又（再用韻）

老矣何堪。隨處是春衫酒滴。醉狂時。一揮千字。貝光玉色。失意險爲湘岸鬼。浩歌又作長安客。且乘流。除卻五侯門。無車跡。驚人句。天外得。醫國手。塵中識。問鼎槐何以。臥雲欹石。夢裏略。

無軒冕念。眼前豈是江湖窄。拚蠅頭蝸角去來休。休姑息。

又（和江亮采）

甚矣吾衰。徒自苦飢腸爲孽。嗟寸祿區區留戀。形疲心竭。江湖一生真可羨。塵埃永盡何堪說。似鈍刀終歲斲空山。寧無缺。拚放浪休豪傑。秋水漲歸期決。儘翫長鶴短。任渠分別。芒屨夜尋溪上酒。葛巾曉挂松間月。向丹霄傳語舊交游。慵非拙。

水龍吟（老人壽詞）

夜來霜拂簾旌。深雲麗日開清曉。香猊金暖。冰壺玉嫩。佳辰寒早。橘綠橙黃。袖紅裙翠。一堂歡笑。正梅妃月姊。雪肌粉面。爭妝點。瀟湘好。莫惜芳尊屢倒。擁羣仙醉遊蓬島。東牀俊選。南溟歸信。一時俱倒。鬢影搖春。命書紆錦。子孫環繞。看他時歸去。飛觴石澗。侍甘泉老。

多麗

帝城春。玉堂深處飛煙。想聖人恩隆內職。左璫押賜。傳宣綵衣。明瑤觴膝下。花盡永錦瑟尊前。富貴從來功名餘事。鼎彝勒徧。筆如椽。向中禁瑣窗偷覷。王母語當年。清平世衣冠是誰。三世甘泉。記年時翹才獻壽。小詩曾滌苔牋。望三槐雲霞交映。照五彩裘繡相鮮。當日非諛。如今方信。門人稱頌是師言。況自有兩宮醲眷。卜夢亦徒然。看指日鼎新化爐。一氣陶甄。

念奴嬌（和王聖俞）

滄浪萬頃。厭塵纓手掬。清流頻洗。落日孤雲煙渚。鷗沒澄波心裏。一舸橫秋。兩橈開浪。霜竹醒煩耳。蕭蕭風露。夢回月照船尾。須信閒少忙多。壺觴并賦詠。莫辜雲水。乘興前溪溪又轉。隱約歸帆天際。紅蓼丹楓。黃蘆白竹。總勝春桃李。浮邱何在。與君共誇琴鯉。

又

競春臺榭。媚東風。迤邐繁紅成簇。方霽溪南。簾繡捲。和氣充盈華屋。金暖香蘇。玉鳴舞珮。春筍調絲竹。烏衣宴會。遠追王謝高躅。藉甚四海聲名。林泉活計。未許翁知足。日日江邊沙露靜。人後東來。雕轂八錦行持。五禽游戲。已受長生錄。衰衣蟬冕。最宜雙鬢凝綠。

又(探梅)

衰翁愁甚。向尊前手撚一枝寒玉。想見梅臺花更好。一片瓊田。栖綠短轡輕輿。大家同去。取酒償醲馥。元來春晚。萬苞空閒黃竹。休恨雪小雲嬌。出羣風韻。已覺桃花俗。羯鼓聲高。回笑臉。怎得天公來促。江上風平。嶺南人遠。誰度單于曲。明朝酒醒。但餘詩興。天北。

風入松(西湖戲作)

少年心醉杜韋娘。曾格外疏狂。錦箋預約西湖上。共幽深竹院松窗。愁夜黛眉顰翠。惜歸羅帕分香。重來一夢覺黃梁。空煙水微茫。同心眼底無蘇小。記舊游凝竚淒涼。入扇柳風殘酒。點衣花雨斜陽。

又

東樓煙重暗山光。春意墮微茫。小紅嫌綠，勻如翦，黯無言。雲渡澄江，沒處與人消遣。倚闌情寄斜陽。共君今夜舉清觴。投老各殊方。癡兒官事何時了，恨花時、潘鬢先霜。喚取客帆聊住，將予同下瀟湘。

又（再用韻）

霏霏小雨惱春光。煙水更瀾茫。昨宵把酒高歌處，任一聲、雞唱清江。悴樵杏花如許，情懷應似東陽。宿醒猶在莫傳觴。清悶苦無方。幾時玉杵藍橋路，約雲英、同搗玄霜。冷落黃昏庭院，夢回家在三湘。

遙天奉翠華引

雪消樓外山正。秦淮翠蘼回瀾。香梢豆蔻，紅輕猶怕春寒。曉光浮畫戟，捲繡簾、風暖玉鉤閑。紫府仙人，花圍羽帔，星冠蓬萊閬苑。意倦游常戲世間。佩麟舊都江左，襦袴歌歡。只恐催歸覲，臚宴都休。訴酒杯寬。明歲應看君鈞容舞袖歌鬢。

暮山溪（建康郡園賞芍藥）

玉麟春晚綠徧甘棠蔭。可是惜花深。旋移得翻階紅影。朱簾捲處，如在古揚州。寶瓔珞，玉盤盂。嬌豔交相映。蓬萊殿裏，幾樣春風鬢。生怕逐朝雲。更羅幕重重遮定。多情絳蠟，常見醉時容。

綵舞袖。蕝歌塵。莫負良宵永。

鳳皇臺上憶吹簫（陽至節戲呈同官）

玉管灰飛。雲臺珥筆。東君颺馭將還。又正是霜花巧翦。梅粉初乾。窈窕紅窗。鬢影添一線。組織工閒。瀟湘好雪。意尙遙。綠占羣山。應思少年壯氣。貪遊樂。追隨玉勒金鞍。更化日舒長。贏得覓醉謀歡。去□桑榆趁暖。任從教。潘鬢先斑。猶狂在。揮翰快寫春寒。

又（再用韻贈黃宰）

塵暗雙鳬。菊明山徑。何妨勸羽知還。最好是詩翁醉後。瓶罄壘乾。一笑東風打耳。心無競遠。與春閑時。□地覓伴訪梅。尋勝登山。清時俊材定用。看捧韶春郊月。露濡鞍。況表識買臣貴骨。琴瑟逾歡。好向玉堂視草。金章映菜子衣斑。山人去。薰帳夜雨空寒。

又（再用韻詠梅）

浴雪精神。倚風情態。百端邀勒春還。記舊隱溪橋。日暮驛路泥乾。曾伴先生薰帳。香細細粉瘦。瓊閑傷牢落。一夜夢回。腸斷家山。空教映溪帶月。供遊客。無情折滿雕鞍。便忘了。明窗靜几。筆研同歡。莫向高樓噴笛。花似我。蓬鬢霜斑。都休說。今夜倍覺清寒。

又（蠟梅用前韻）

淺染霓裳。經勻漢額。巫山行雨方還。最好是肌香蠟瑩。萼嫩紅乾。曾見金鐘在列。鈞天罷笳簫。

都開妖饒似曉鏡乍開綠沁眉山。休誇瘦枝疏影。湘裙窄一鉤龍麝隨鞍。便更做山人倦賞。畏冷無歡。爭奈冰甌彩筆。題詩處珠玑爛斑。清宵永相對。莫放杯寒。

蝶戀花（次韻張子原尋梅）

雪壓小橋溪路斷。獨立無言。霧鬢風鬟亂。拂拭冰霜君試看。一枝堪寄天涯遠。擬向南隣尋酒伴。折得花歸。醉著歌聲緩。姑射夢回星斗轉。依然月下重相見。

清平樂（詠橄欖燈毬兒）

縷金翦綵。茸綰同心帶。整整雲鬟宜簇戴。雪柳鬧蛾難賽。休誇結實炎州。且看指面纖柔。試問苦人滋味。何如插鬢風流。

又

忍寒情味。枝染薔薇水。攪照清溪花影碎。笑殺小桃穠李。一生占□春妍。偏宜月露娟娟。欲寄江南春去。亂鷗點破雲牋。

玉樓春

市橋燈火春星碎。街鼓催歸人未醉。半嗔還笑眼回波。去欲更留眉斂翠。歸來短燭餘紅淚。月淡天高梅影細。北風休遣雁南來。斷送不成今夜睡。

又（次中秋閨月表舅晁仲石韻）

今秋仲月逢餘閏。月姊重來風露靜。未勞玉斧整蟾宮。又見冰輪浮桂影。尋常經歲睽佳景。閱月那知還賞詠。庾樓江閣碧天高。遙想飛觴清夜永。

秦樓月（與楊君致月夜泛舟）

天一色。玉槃冷浸瀟湘碧。瀟湘碧。短亭繫纜。隔江聞笛。胡牀對坐涼生腋。通宵說盡狂蹤跡。狂蹤跡。少年心事。老來難得。

新荷葉（金陵府會鼓子詞）

柳幄飛絲。風池暖泛新萍。燕壘泥香。玉麟堂外春深。晴雲麗日。花濃處。蜂蝶紛紛。儂春一醉。管絃聲裏歡聲。況是清時。錦衣重到臺城。故國江山。向人依舊多情。趁閑行樂。休辜負。冶葉繁英。彤庭歸覲。恁時難駐前旌。

菩薩蠻（湖上卽事）

樓前曲浪歸橈急。樓中細雨春風溼。終日倚危闌。故人湖上山。高情渾似舊。只在東陽瘦。薄晚去來休。裝成一段愁。

又（小女淑君索賦晚春詞）

東風吹夢春醒惡。瑣窗淡淡花陰薄。一夜曲池平。小窗雲樣明。綠輕眉懶暈。香淺羅衣潤。未見海棠開。捲簾雙燕來。

又(饒州華老)

江風漠漠寒山碧。孤鴻聲裏霜花白。畫舸且停橈。有人魂欲銷。
相從能幾日。總是天涯客。尺素好頻裁。休言無雁來。

又(茶蘼)

東君管盡閒花草。紅紅白白知多少。末後一瓊香。綠庭春晝長。
道人心似海。夢冷屏山外。莫剪最長條。從教玉步搖。

又

東風捲盡欺花雨。月明皎紙庭前路。月底且論詩。從教露濕衣。
明朝愁入緒。各自東歸去。後夜月明中。綠尊誰與同。

又(木犀十詠。帶月)

綠帷翦翦黃金碎。西風庭院清如水。月姊更多情。與人無際明。
濃陰遮玉砌。桂影冰壺裏。滅燭且徜徉。夜深應更香。

又(披風)

靚妝金翠盈盈晚。凝情有恨無人管。何處一簾風。故人天際逢。
從教香撲鬢。只怕繁華盡。牢落正悲秋。非誰解愁。

又（照溪）

江梅占盡江頭雪。忍寒玉骨誇清絕。不似杜秋娘。婆娑秋水旁。波光涵晚日。照影從教密。隱隱認遙黃。隔溪十里香。

又（過露）

黃昏曾見淩波步。無端暝色催人去。一夜露華濃。香鎖蘭菊叢。縷金衣易溼。莫對西風泣。洗盡夜來妝。溫泉初賜湯。

又（命鵲）

休文多病疏杯酌。被花惱得心情惡。碧樹又驚秋。追歡懷舊遊。與君聊一醉。醉倒花陰裏。斜日下闌干。滿身金屑寒。

又（替髻）

交刀剪碎瑠璃碧。深黃一種瓏鬆色。玉蕊縱妖嬈。恐無能樣嬌。綠窗初睡起。墮馬慵梳髻。斜插紫鸞釵。香從鬢底來。

又（熏沈）

黃姑青女交相忌。眼看塵土占芳蕊。急掃滿闌金。小匳熏水沈。博山銀葉透。濃馥穿羅袖。猶欲問鴻都。太真安穩無。

又(來夢)

午庭栩栩花間蝶。翅添金粉穿瓊葉。曾見羽衣黃。瑤臺淡薄妝。醒來魂欲斷。摻摻芳英滿。夢裏尙偷香。何堪秋夜長。

又(寫真)

霓裳舞罷難留住。湘裙緩若輕煙去。動是隔年期。生綃傳豔姿。精神渾似舊。碧暗黃金瘦。永夜對西窗。何緣襟袖香。

又(怨別)

揉香嗅蕊朝還暮。無端卻被西風誤。底死欲留伊。金塵簌簌飛。茂陵頭已白。新聘誰相得。耐久莫相思。年年秋與期。

西江月

金鼎香銷沈麝。碧梧影轉闌干。可庭明月綺窗閑。簾幕低垂不捲。一自高唐人去。秋風幾許摧殘。拂簷脩竹韻珊珊。夢斷山長水遠。

又(贈蔡仲常侍兒初嬌)

豆蔻梢頭年紀。芙蓉水上精神。幼雲嬌玉兩眉春。京洛當時風韻。金縷深深勸客。雕梁款款飛塵。主人從得董雙成。應忘瑤池宴飲。

青玉案（東園錢母舅見閨學鎮臨川）

東風一夜吹晴雨。小園裏春如許。桃李無言情難訴。陽關車馬。灞橋風月。移入江天暮。雙旌明日留難住。今夕清觴且頻舉。咫尺清明三月暮。尋芳賓客。對花杯酌。回首西江路。

又（爲外大父林下老人壽）

年年寓屋稱觴處。陪綵綬尊前舞。牢落瀟湘歸去未。臘梅開徧。冰蟾圓後。夢斷靈溪路。長年厚福天分付。算四海今獨步。澗竹巖花如舊否。與翁相伴。歲寒庭戶。儘占閒中趣。

又（戲用賀方回韻餞別朱少章）

三年牢落荒江路。忍明日輕帆去。冉冉年元真暗度。江山無助。風波有險。不是留君處。梅花萬里傷遲暮。驛使來時望佳句。我拚歸休心已許。短篷孤棹。綠蕙青笠。穩泛瀟湘雨。

昭君怨（亦名宴西園）

晴日烘香花睡。花豔浮杯人醉。楊柳綠絲風。水溶溶。留戀芳叢深處。懶上錦驄歸去。待得牡丹開。更同來。

四犯令

月破輕雲天淡注。夜悄花無語。莫聽陽關牽離緒。拚酩酊。花深處。明日江郊芳草路。春逐行人去。不似酴醾開獨步。能著意。留春住。

鷓鴣天（縣園約同官賞海棠）

萬點胭脂落日烘。坐間酒滿散微紅。誰教豔質撩潘鬢。生怕朝雲逐楚風。尋畫燭。照芳容。夜深兩行錦燈籠。朱唇翠袖休凝竚。幾許春情睡思中。

又

蜀錦吳綾翦染成。東皇花令一番新。風簾不礙尋巢燕。雨葉偏禁鬪草人。非病酒。不關春。恨如芳草思連雲。西樓角畔雙桃樹。幾許濃苞等露勻。

又（賞芍藥）

夢想當年姚魏家。尊前重見舊時花。雙槩分焰交紅影。四座春同粲晚霞。杯潑潑。帽欹斜。夜深絕豔愈清佳。天明恐逐行雲去。更著重重翠幕遮。

又（送田簿秩滿還晉川）

只有梅花是故人。歲寒情分更相親。紅鸞跨碧江頭路。紫府分香月下身。君既去。我離羣。天涯白髮怕逢春。西湖蒼莽煙波裏。來歲梅時痛憶君。

朝中措（雙頭芍藥）

翻階紅藥競芬芳。著意巧成雙。須知揚州國豔。舊時曾在昭陽。盈盈背立同心。對綰聯萼飛香。牢貯深沈金屋。任教蝶困蜂忙。

又（建康大雪，戲呈母舅晁留守）

漏雲初見六花開，驚巧妬江梅。飄灑元戎小隊，玉妝旌旆歸來。恩同化手，春回隴畝，權倒尊罍。記取明朝登覽，綠漪惟有秦淮。

又（謝郭道深惠菊有二小鬟）

露英雲萼一般清，揉雪更雕瓊。預喜重陽登覽，大家插帽浮觥。分香減翠，殷勤遠寄，珍重多情。不似綺窗雙豔，向人解語傾城。

又

依依春綠徧江干，煙水小屏寒。惆悵雁行南北，新詞不忍拈看。從今寄取，臨風把酒，役夢忘殫。飛絮落花時候，扁舟也到孤山。

又

風簾交翠篆香飄，卻暑捲輕綃。最好佳辰相近，壽觴對飲連宵。仙翁未老，雲中跨鳳，臺上吹簫。看取他年榮事，魚軒入侍塗椒。

又（元夕上潭師劉共甫舍人）

年來玉帳罷兵籌，燈市小遲留。花外香隨金勒，酒邊人倚紅樓。沙隄此去，傳柑侍宴，天上風流。遠記月華小隊，春風十里潭州。

又（爲雲庵壽）

年年重午近佳辰。符艾一番新。滿酌九霞奇醞。壽君兩鬢長春。閨中秀美何如。賦得林下精神。早辦荆釵布袖。共爲雲水閑人。

點絳脣（金陵府會鼓子詞）

春日遲遲。柳絲金淡。東風軟。綠嬌紅淺。簾幕飛新燕。玉帳優游。贏得花間宴。香塵遠。暫停歌扇。沈沈深深院。

又

約莫香來。倚闌低瞰。花如雪。怨深愁絕。瘦似年時節。歲一相逢。常是匆匆別。歌壺缺。又還吹徹。笛裏關山月。

蘇武慢（湖州趙守席上作）

暗雨收梅。晴波搖柳。萬頃水精宮冷。橋森畫棟。岸列紅樓。兩岸翠簾交映。天上行舟。鑑中開戶。人在蕊珠仙境。況吟煙嘯月。彈絲吹竹。太平歌詠。人盡說銅虎分賢。銀潢儲秀。鞏固行都。藩屏棠陰散暑。鼎篆凝香。永日一庭虛靜。紅袖持觴。綵箋揮翰。適意酒豪詩俊。看飛雲丹詔。行沙金勒。待公歸覲。

阮郎歸（和邢公琰）

莫欺騎省鬢邊華。曾眠蘇小家。綵絲縈腕翦輕霞。菖蒲酒更嘉。
人別後。歎飛花。雲山和夢遮。吳牋小字寫流沙。幾行秋雁斜。

又（爲邢晉仲小鬟賦）

美人小字稱春嬌。雲鬢玉步搖。淡妝濃態楚宮腰。梅枝雪未消。
拚惱亂。儘妖嬈。微窩生臉潮。算來虛度可憐宵。醉魂誰與招。

又（爲張丞壽）

熏風吹盡不多雲。曉天如水清。哦松庭院忽聞笙。簾疏香篆明。
蘭玉盛。鳳和鳴。家聲留漢庭。猱鞍長傍九重城。年年雙鬢青。

浪淘沙

曉日掠輕雲。霜瓦鱗鱗。六朝山色儼如新。家在洞庭南畔住。身在江濱。
華髮照烏巾。無意尋春。空將兩袖拂飛塵。可惜梅花開近路。惱盡行人。

踏莎行（壬午元宵戲姜元汝功參議）

元夕風光中興時候。東風著意催梅柳。誰家銀字小笙簧。倚闌度曲黃昏後。
撥雪張燈。解衣貰酒。觚稜金碧聞依舊。明年何處看昇平。景龍門下燈如晝。

又（約雲庵尋梅）

雪意初濃。雲情已厚。黃昏散盡扶頭酒。不知牆外夜來梅。忍寒添得疏花否。休更熏香。且同攜手。從教策策輕寒透。亭兒直下玉生煙。暗香歸去霑襟袖。

浣溪沙（三衢陳釜上作）

客裏匆匆夢帝州。故人相遇一杯休。疏梅些子最清幽。雙綰香螺春意淺。緩歌金縷楚雲留。不知妝鏡若爲憐。

又（次韻王子弁紅梅）

倚醉懷春翠黛長。肉紅衫子半窺牆。蘭湯浴困懶勻妝。應爲長年淪絳雪。故教丹頰耐清霜。弄晴飛馥笑馮唐。

又（次韻杜唐佐秋懷）

春夢驚回謝氏塘。篋中消盡舊家香。休文多病怯秋光。空對金盤承瑞露。竟無玉杵碎玄霜。醉魂飛度月宮涼。

眼兒媚（效易安體）

花信風高雨又收。風雨互遲留。無端燕子。怯寒歸晚。閑損簾鉤。彈棋打馬心都懶。攬撥上春愁。推書就枕。覺煙淡淡。蝶夢悠悠。

漁家傲

過盡百花芳草滿。柳絲舞困。闌干暖。柳外鞦韆裙影亂。人逐伴。舊家心性如今懶。斗帳寶香凝不散。黃昏院落。鶯聲晚。紅葉不來音信斷。疏酒盞。東陽瘦損無人管。

又（小舟發臨安）

本是瀟湘漁艇客。錢塘江上。鋪帆席。兩處煙波天一色。雲霧羃。吳山不似湘山碧。休費精神勞夢役。鷗鳥難上。銅駝陌。擾擾紅塵人似織。山頭石。潮生月落今如昔。

臨江仙（約同官出郊）

一抹煙林屏樣展。輕花岸柳無邊。連朝春雨漲平川。琴琴迎社鼓。渺渺下陂船。同事多才饒我懶。乘閒縱飲郊園。髻花欹側醉巾偏。時豐容卒歲。遊樂更明年。

又（同官招飲席上作）

失脚青雲何所往。故山松竹應秋。癡兒官事幾時休。可憐雙白鬢。斗粟尙遲留。尊酒儺閒聊放曠。夜涼河漢西流。從教孤笛噴高樓。與君同一醉。明日旋分愁。

柳梢青（贈張丞）

小院輕寒。酒濃香輓。深沈簾幕。我輩相逢。歡然一笑。春在杯酌。家山辜負猿鶴。軒冕意秋雲似薄。我自西風。扁舟歸去。看君寥廓。

又（送呂子紹守峽）

楚天清絕。葦岸蘭汀。素秋時節。簾捲湘鬟。香飛雲篆。耐看輕別。明朝底處關山。算總是愁花恨月。白馬江寒。黃牛碇靜。小梅初徹。

杏花天（豫章重午）

寶釵整鬢雙鸞鬪。睡來醒熏風襟袖。綵絲皓腕宜清晝。更艾虎衫兒新就。玉杯共飲菖蒲酒。願耐夏宜春廝守。榴花故意紅添皺。映得人來越瘦。

江城子（萍鄉王聖俞席上作）

萍蓬蹤跡幾時休。儘飄浮。爲君留。共話當年。年少氣橫秋。莫嘆兩翁俱白髮。今古事。盡悠悠。西風吹夢入江樓。故山幽。漫回頭。又是手遮西日望皇州。欲向西湖重載酒。君不去。與誰遊。

南歌子（爲呂聖俞壽）

菊潤初經雨。橙香獨占秋。碧琳仙釀試新莠。內集熙熙。休試蟻浮甌。家世傳黃閣。功名起黑頭。雙鳬聊傍故人舟。咫尺青雲。歧路看英遊。

瑞鷗鵲（送晁伯如舅席上作）

遙天拍水共空明。玉鏡開匳。特地晴。極目秋容無限好。舉頭醉眼暫須醒。白眉公子催行急。碧落仙人著句清。後夜蕭蕭葭葦岸。一尊獨酌見離情。

天仙子（宴五侯席上作）

暖日麗晴春正好。楊柳池塘風弄曉。露桃雲杏一番新。花窈窕。香飄渺。玉帳靚深聞語笑。新
賜繡韉花映照。須信濃恩春共到。漢家飛將久宣勞。迎禁詔。瞻天表。入衛帝庭常不老。

醉落魄（夜靜聞琴）

銅壺漏歇。紗窗倒挂梅梢月。玉人酒暈消香雪。促軫調絃。彈個古離別。雖爲小鳳交飛說。嘈
嘈輾語丁寧切。相如欹枕推紅氈。脈脈無言。還記舊時節。

又

梅花似雪。雪花卻似梅清絕。小窗低映梅梢月。常記良宵。吹酒共攀折。如今客裏都休說。瀟
瀟灑灑情懷別。夜闌火冷孤燈滅。雪意梅情。分付漆園蝶。

又

玉鉤珠箔。夜涼庭院天垂幕。好風吹動綸巾角。羽扇休揮。已怯絳衣薄。扁舟明日清溪泊。歸
來依舊情懷惡。爲君喚月。騁鸞鶴。天近多寒。滿飲金鑿落。

減字木蘭花

春醒拚卻。鷓鴣一聲花雨落。蜜炬紅殘。人在青羅步障間。天公薄相。慣得柳綿高百丈。綵筆
題詩。休誦騷人九辨詞。

鵲橋仙（和蔡子周）

宋六十名家詞

三

鶴髮蕭森。玉顏腴潤。養就黃芽金鼎。一區松菊老湘濱。但心遠何妨人境。袞衣家世。鳴鸞歌舞。到了春冰消盡。不須悵惆夢中身。這彩選輸贏誰省。

嬾窟詞跋

彥周東武人。晁氏甥也。渭陽之誼甚篤。如玉樓春青玉案朝中措瑞鷗鵠諸調。情見乎詞矣。其席上送行云。後夜蕭蕭葭葦岸。一尊獨酌。見離情。不讓徐勉送客曲。弇州先生病美成。不能作情語。彥周殆能作情語者耶。海虞毛晉識。

